




Contenta. 69.

Testament & vltim. voluntatib. Roland Bonomen
Sicut scilicet ab iure stato. 298
Epste duc. altā Clemē. 7. ppe. Altā Carol. 5. Imperator
Epste antiquissime ex sacre institutionis pontificis & Imperator
Cromin new manifestely historien. diff. Examine etc.
Vom glauben und guten wercken was die vorwilt zur felicität
Berühmte Senare von Roma. 1527. gewaltiglich eingenommen in
Contra ad remouendos abusu. & ordinatio ad dei vtrā reformandam
Ein gesprech zwueyer cheimelich do einer der andern über
Iren man dazh in Eras. 20.

De. 145.

~~Lb. 58. (1-8) R~~

*Cum prout bonas. ronan y vste zwicken. At homo magy astringit polluy. 2d/18
 sub lapido vnto demittit iam poute & hincq abyt. Gndaxoz eduzs rōuimo
 vnanit a luxu zvorate. magy ferunt si pland pzet & vgt, magy effit. plurimifm mo
 subby
 by. vba
 and Gmf.
 fu. m
 Gmmbog
 fo. 32.*



**Ein gesprech zwap
 er Ehelicher wep=
 ber/die eyne der andern vb
 er den man klagt/ vō Eras
 mo Roterodamo latey=
 nisch beschrieben allen
 ehelcutten/zu merck
 lichem nucz vñ fro
 mmen/gedeut
 schet.**

M. D. XXV.

Dem Ersamen wolweyßen

Herman Dulpffort / Burgermeyster
zn Zwickaw / meynem besonder
gunstigen herrn vnd
forderern .

Nad vnd friede von Gott / durch Chri-
stum Ihesum vnsern Heyland. Sun-
stiger lieber herr vnd bruder / myrist ynn
kurcz vorgangnen tagen / eyn schoner lusti-
ger Dialogus / Erasmi von Roterodam / vnter an-
dern / ynn seynem gesprechbuchleyn / zu handen Ko-
mtu / Inn welchem er furnemlich anzeygt. wie che-
leut / wen zu zeytten zorn / zwytracht vnn vneyng-
keyt vnter sie kommet / sich mugen verschonen / Vnd
wie vngeschliffene / grobe menner / darzu vngesoge-
ne / halstorrige weyber / zu eym friedlichem leben zu
bringen sind et c .

Die weyl ich den nu / aus gnad vnn barmhercz-
igkeyt Gottes / eyn iunger eheman wordenn / bereyt
sihe / wie es vmb eyn ehelich leben stehet / hat ich eyn
sonderlichen lust / diesen Dialogum aus dem Latei-
yns deuczsche zu bringen. Darzu mich nichtt wenig
voursachten / die yczigen schwynden leuffte ynn der
welt / do vnser haubtfeynd der teuffel / viel vnglucks
vnd herzenleydt / vnder denn ehelichen anrichtet / al-
so das mancher / auch Christlich vn̄ aus gutter wol-
meynung / sich heutthe ynn ehelichem stand begibt /
vnn morgen des weybs gerne los wehre / Daraus
denn notthalben / zand / hadder / keyffeln / rauffen /
schlahen vnd alles vngemach volgen mus / dis alles
kan der teuffel meysterlich zu wegen bringen . Vnn
die weyles so zu gehet / hab ich dar an eyn gewis zey-
chen das

chen/dz der ehelich stand fur war Gottes werck ist/
vñ das der seligk sey/Dem Gott dareyn hilfft. Den
das ist nu/Gott lob/bey vns gewis war/was Gott
ordent vñ thut/Kan der Satan vnangefochte nichtt
lassen. Also auch hic/sucht er alle list vnd kunste/das
ehr dis werck/den ehestand/vnbeschmiczt nicht las-
se / greyfft ynn tapffer an/mit ganzem ernst/an alle
seytten/iez zur lincen/balde zur rechten/so das/ehr
wo nicht glaub vnd der geyst Gottes ist/bald zu we-
gen bringt/allen widderwillen / vordris vnd vnlust.

Es sind ettliche/auch vnter den fursten/Herrn
vnd grossen hantzen/die doch verstendiger/weyser/
kluger seyn sollten / denn der gemayne mann/denn
nichts so vbel gefelt (das sie yhe ettwas an Gottes
wercken zu taddeln vnd zu lestern haben) denn das
Munche/Pfaffen vñd Nonnen /ehelich werden/
geben fur/sie thuens aus lautter furwicz vnd fleysch-
licher lust halben/die armen/blinden /tollen leutte.
Es ist warlich eyn geringe lust dar bey. Ich halt /sol-
ten die selbigen/angst vnd nott leyden / yr nahrung
ynn mube/sorge vnd schweys yhrs angesichts / wie
ander arme handwerckts leutte/erwerben/wurden
der lust wol vorgessen /vnd dauon stillschweygenn/
Weyl sie aber nichts den wollust suchē/nicht alleyn
ynn der ehe/sondern ynn allen yhren hendelen vñd
furschlegen/Konnē sie es nicht lassen/mussen andere
leutte nach yhren herzen richten vnd taddeln.

Wenn die Munche / Pfaffen / Nonnen vnd
das volck/derhalben aus den flostern giengen /hielt
ich sie vor grosse narren. Denn ich weys so viel
drumb/das/wen ich mich des handels vleissen wol-
de/wust ich keyn bessern deckel darzn/denn eben eyn
munch werden. Eyn heylig kleyd ist die kappe / wie
A ij sie sagen

sie sagen aber sie bedeckt manchē bosen buben/was
durfften sich die gutten leuttichen ynn soichenn
schways / angst / nott vnnnd widderweirckeyt / frey/
willigk zu stossen / vmb des willenn / das sie / on alle
muhe vnd bekummernus / yn klostern vol auff habē
Ey w. e. eyn narr wer mir das / der vff eyn vorhang/
nem wagemn fahren konde / vnnnd wolde lieber yhn
drecke gehen. Zur not / spricht S. Paulus nicht zur
lust / sol eyner eyn weyb nemen .

Wenn wollenn vnser Papiſten / mit yhrem an/
hangk / eyn mal die augen / yhrer scharfsinnigen ver/
nunfft / auffthuen / vnd erkennen den yrthumb / dar/
ynnen sie nu eyn lange zeyt liegen / Ist das das helle
licht ym menschen / die vernunfft / des sie sich so fast
rhumen / die hochgeleuten / vnd kan das nicht besehē
das besser sey / eyn eheweyb zu haben / denu sich mit
allen huren schleppen / ehebreyerey vnd andere vn/
art treyben ? Ich mayne das heyst geleucht / ia wie
eyn dreck ym eyner latern / O we des liechts / wie
hattts vns / von dem rechten gottlichen wege vnnnd
warheyte / abegefurt . Wenn wyr (vnangesehen
Gottes zorn vnd straffe) nur bedencken / was vor ge/
fahr / beyde leybs vnd gutts / die armenn leutte / die
buler / vnd sonderlich die ehebreyer / gewarten mus/
sen / werden wir zu bekennen gezwungen / das es eyn
elend wesen drum ist / voller iamers / voller nott /
voller bekummernus / vnd voll alles herczbetrubten
leydes . Ach herre Gott / wie werden deyne werck so
gelestert vnnnd versprochen : erbarme dich eyns vber
vns deyne creaturen / vmb wilcher willen du so viell
gethan hast / las vns doch widder zu deynem Gott
lichem erkentnus kommen / das wir thuen / was vor
deynen augen gut ist / Amen .

Die weyl

Die weyl vns nu dis gesprach (vff das ich wid-
der zur sache köme) lernet / wie zurriffene gunst / liebe
vnd freuntschafft / vnter denn eheleutten / moge wid-
derumb versubnet werden / vnd dise gemeyne klage /
icz schyr ynn der ganczen welt gehet / Ich hab eyn
bos beyb / Ich hab eyn bose man / duncket mich / ich
thue nicht vbel daran / das ich dis Buchleyn / also
yn vnser teutzsch gebracht / antagkommen lasse .

So dann ich E. W. als meyn gunstigen herrn
vnd forderer alzeit vor marckt / dar zu erkant / wie ew-
er hertz gegē Christlichem gemeynem nucz / yn gro-
sser begird / vnd hefftigem ernst stehe / mit stethem
erseuffzen zu Gott / vmb eyn Christlichen eusserlich
en wandel / vnd der ehestand nichtt das geringste
stück Christliches lebens ist / Hab ich dis buchleyn
euch / als meyne ersten arbeyt zu geschriebenn / wel-
cher ich mich / zu nucz vnd frommen aller eheleut-
hab vnterwunden / vff das die armen leuttichen / die
zu zeytten nicht wol / mit weibnemen vnd maneh-
menn / vorsorget / etwas hetten / auch eusserlichs /
daraus sie sich doch eyn wenig / wusten ynn solchen
anstossen zu halden / wie wol wir auch domit nichtt
viel wurden ausrichtē / wo der nicht seyne gnad vor-
leyhet / der aller Christglaubigen hertzē / sie zu lenck-
en wo hyn er will / gewalt vnd macht hat .

Wil aber das zuuo: E. W. vnd eyn iczlichem
der es lieset / erynnern / das ich mer vleis angewand /
das der sentencz vnd die mainung blyebe / denn das
ich die wort hergezelet hette / Wann eynn getrewer
Dolmetscher / wie d Poet Horatius spricht / gibbt
nicht wort vmb wort . Werd ich vermerckenn / das
dise meyne muhe E. W. vnd andern / gefalle / will
ich mich / etwas bessers vnd nuczlichers / wils Got
zuuortenczschē nicht beschweren / domit ich gemay-

A iij nem hauffen

nem hauffen auch dienen mochte. E. W. wolle dis
izit ym besten von mir annehmen / vnd sich grossers
dienste nach meynem armen vormugem / allzeytz
myr vorsehen.

Hiermit befehle ich E. W. sampt ewer geliebte
hausfrawen / Gott dem almechtigen / vnd seynem
Christo / der wolle ym euch selig ich / das ehr ange
fangem hatt / volbringen. Brisset vleyssig. Lau
rentium Bernsprunck Burgermeister / Gothart
Buttner / Nicolaum Hausman eweren
Bischoff / Wolffgangum Zceyner /
vnd andere meyne herrn vnd brus
der ym Christo. Seben zu

Leypzick am tage der

Heyligen drey

Konigt

Nach Christi
vnser Herrs ges

burt / Im

1525.

Jar.

E. W.

Williger

Stephan Rodt

Eyn gesprech zweyer Ehelicher weyber . eulalia vnd xantippe genant .

die sich vnterreden / yhrer mennier halben . Eulalia hebt an vnd spricht

Wil glucks meyn auserwelte Xantippe .
XAN. Viel glucks widderrumb / meyn aller liebste Eulalia / mich deucht du seyst
iczt viel schoner den du pflegst . EULA.
Dustu mich den als balde mit honische worten entpfahen?
XAN. Neyn warlich / du deuchst mich vorwar so schon seyn .
EUL. villeicht macht mich das Pleyd so woll gestalt .
XAN. Du sagst warlich recht ich hab lang nichts hubschers gesehen / ich halt es sey Englisch tuch?
EUL. Es ist Englische wolle / aber zu Venedigen ist sie geferbett .
XAN. Ist doch weycher den seyde . Ey wie eyn liebliche scharlack ist das?
Wann komptt dyr so eyn kostlichs geschenck?
EUL. Wo sollens fromme ehliche weyber anders nemen / denn von yhren mennern?
XAN. O wie seelig bistu / die ein solchen man vberkommen hat / ich aber wolde / das ich die weyl yrgentt eynem groben albern tolpel / fur meynen Nickel zur ehe genommen hett .
EUL. Wie gehet das zu? seyt yhr der sachen vntter eynander so bald vneyns worden?
XAN. Hab sorg ich werde mit ein solchē manne / nimmer mehr vber eyn komme / Sihe doch / mein liebe Eulalia / wie zurissen ich hergehe also lest meyn man seyn weyb hereyner gehē .
Gott todte mich / wen ich mich nicht offst scheme / an die gassen zu kommen / so ich seh / wie geschmuckt die andern frawenn seynd / die doch viel ermere mennier haben denn ich .
EUL. Ehrlicher frommer weyber geschmuck / stehet nichtt ynn Pleydern

Kleydern / nach vff anderer zierde des leybs / wie
Sant Peter lernt (als ich nu ynn der predigte eyns
horet) sonder ynn eynem zuchtigen syttigen gepehr /
vnd vff yinnerlichem schmuck / der ym herzen vnd
gemut ist. Die huren schmucken sich yhr vielen zu ge
fallen. wir sind schon genug geschmuckt / wenn wir
nur vnsern mennern gefallen. XAN. Aber ynn des
nichts desterweniger / ist meyn frommer mann do /
der sich doch gegen mir ganz kercklich hellt / schlem
met weydlich / bring all mein morgengab hyndurch
der eh: nicht wenigk von mir eyngenomē hat. EV.
Wo mit bringt eh: hyndurch? XAN. Wo mit es
yhn nur gelust / mit sauffen / mit huren / mit spielen.
EV. das laut nicht wol. XAN. Es ist nicht anders
Darnach wen er mir trunckē anheym kommet / bey
sinckender nacht / vnd ich hab lang vff yhn gewart /
so schnarckt er die ganzen nacht / zu zeytten speyet
eh: mir das bett voll / des andern wil ich geschwey
gen. EV. Du vnerst dich selbst / wen du deyn man
vnehrest. XAN. Gott geb mir nicht zu leben / wenn
ich nicht lieber bey eyner sawe schlaffen wolde / denn
bey eynen solchen manne. EV. Schiltstu yhn den
nicht? XAN. Ja ich handle yhn wie ers vordienet /
eh: hort woll / dz ich auch zehne ym maul habe. EV
Was thut eh: darzu? XAN. Von erstē schreyhet er
hefftigk vnd grausam herwider / maynet er wollts
dohyn bringen / das er mich mit ernstern Worten ab
schreckte. EV. Habt yhr euch nye geschlagen bis
vffs rauffen? XAN. eyn mal alleyn / kamen wir so
hart zu samen / das es gar ein wenigk fehlet / wir het
ten vns geschlagen. EV. Was hor ich nur? XAN
Er drawet mir schon mit dem knuttel / vnd wolde
schlahē / schrie gresslich / vñ fluchet scheusslich. EV.
forchtestu

Forchtestu dich doch nicht: **Xa.** Ya ich erwuschte auch
widerumb ein stuel/vñ het er mich mit einem finger
angerut/er sold wol gesehen habē/das ich auch hett
schlahē könne. **EV.** Was ist das fur ein newe wehr
Hastu keyn rocken/den du fur ein spies genomē het
test: **XAn.** Ich wolt yhm zu schaffen gnug geben ha
ben. **EV.** Ach meyn liebe Xantippe/es rheimet sich
traum nichtt also. **XAN.** was: es rheimet sich odder
rheimet sich nicht/helt er mich nicht fur sein weib/so
will ich yhn auch nicht fur meyn man hallten. **EV.**
Paulus aber lernt/das die weyber denn mennern
sollen vnterworffen seyn vñ gehorsam/mit aller ehr
erbittung. **Vnd S.** Peter helt vns fur/das exempel
Sare/die yhrē man eyn herrn hies. **XAn.** Das hab
ich alles wol gehort. Es lernt aber Sanct Paulus
auch widderumb/das die menner sollen yhre wey
ber lieben/wie Ch:istus seyne braut/die kirche/ge
liebt hat. Er gedencke was ym zu thun ist (so wil ich
auch nicht vergessen/was ich thun sol. **EV.** Aber
dennoch/wen es die wege erreichet/vñ dozu kompt/
das eyns dem andern weychen mus/so ist billicher/
das das weyb dem manne weyche **XAN.** Iha liebe
Eulalia/wen der anders eyn man zu nennen ist /der
mich nicht anders helt/den wie eyn mayd. **EV.** Nu
sage myr liebe Xantipe / drawett er dyr darnach
nymmer zu schlagen: **XAn.** Iha traum(er horet auff
zu drawen/vñ merckts wol/sonst werr er geschlagen
worden. **EV.** Aber du liessst nicht ab /dich mit ym
zu zandē vnd zu keyffeln: **XAn.** Ich wil auch nicht
ablassen. **EV.** Was thut er denn yn des dazu. **Xan**
Was soll er thun: zu zeytten schlefft er eyn schalck:
schlaff/offt thut er nichts anders/den lacket vñ spott
tet meyn darzu / bald erwuschet er eyne lauttenn/die
hatt kaum drey seyttenn / die schlehet er / so seht er
B ymer

yimmer kan / das verdreussert mich trefflich sehr / ich
schreyhe vnd scheide wie ich wolle. **EV.** Verdreusst
dich das so gros? **Xan.** Ja / ich kans kaum sage / wie
weh es mir thut / ich enthalde mich zu zeytē schwer
lich / das ich nit mit feusten dreyn schmeysse. **EV.**
Meyn liebe **Xantippe** / wilt du mirs vorgunnen / eyn
wenig vor dir diste freyer zu reden? **Xan.** Ja ich ga
ne dirs gern. **EV.** Du solts widder macht haben
Es foderts auch vnser gemeine freutschafft die wir
von iugent auff mit cynander gehabt habē / das wir
frey zusammen vnser notturfft reden mugē. **Xan.** Du
sagst warlich recht / ich hab meyn lebenlang yn mey
nem herzen keyne liebere gespiele vnd freundin ge
habt / den dich. **EV.** Es sey dein man wie er ymmer
wolle / so gedenc̄ darauff / dz du es nicht recht hast /
yn zu r̄kiesen. Vorzeytten wen eheliche leut auff
allerhohiste mit cynander vneyns waren / so was dz
die lezte hulff vnd trost / dan man sie vom cynander
scheydete / aber das ist nu auffgehabe / der mus dein
man seyn bis an deyn ende / vn̄ des gleichen must du
seyn weyb bleybenn. **Xan.** Gott gebe ynn alles vn
gluck / die vns das recht / vnd die freyheyt / habē hyn
weck genomē. **EV.** Das laut nicht wol / w̄z redestu?
Christus hats also wollen habē. **Xan.** Das gleube
ich schwerlich. **EV.** Es ist nicht anders. Nu aber ist
keyn neher rad / denn das sich eyns nach des andern
art vnd weyse richte / beuleysset euch eynigk vnd frid
sam vntereynander zu leben. **Xan.** Kan ich yn wid
derumb anders machen? **EV.** Meyn liebe **Xan
pe** / es leyt den weybern nicht ein wenig dran / wie yn
die menner geratē. **Xan.** Wie geths dir mit deynem
manne / stehet yr wol miteynander? **Eul.** Es hat no
ch keyne nott / iczt ist alles gut. **Xan.** Beginstu dich
nicht vbel mit ym am ersten? **Eul.** Neyn / es hatt sich
niekeyn

nie keyn vngewitter vnter vns erhabē / noch dennoch
wie es gemeyniglich geschiet / so sindt zu zeytten fin-
stere wolcken mit vnter gelauffen / die mochten ein
trub bos wetter gemacht habē / wen man sich nichtt
hette furgesehē / vñ eyns des andern weyse duldig ge-
tragen. Es hat eyn iczlicher seyne weyse vnd eyn iczli-
cher hatt seyner kopff / vnd wenn wir die warheyte wol-
len sagen / so hat eyn iczlicher seyne gebrechē / welche
so man sie yrgend wissen solde / furwar so munstens
ehelcut vnter eynander wissen / doch die selbigenn ge-
brechen nichtt lassen. **XAN.** Du redest warlich recht
EVL. Es begibt sich aber zu zeytten vnd offft / das
mahn vnd weyb vneyns werden / vnd sich vñ freunt-
lich zusamen stellen / eh: eyns das andere recht erken-
net. Do mus man vor allen dingen achtung auff ha-
ben / dem wenn eyn mal zwitteracht vñ heimlicher
hass vnter yhn entspringet / kompt man schwerlich
widder zu foriger gunst / liebe vnd freuntschafft / son-
derlich so die sach zu hefftigen / hefftigen scheltwortē
komen ist. Wen zwey ding zusamē geley met werden
vnd man als bald vngestumme damit vmbgehet / so
hellts nicht lang / gehet fluchs widder voneynander
Wen aber der leyhm dur wird / vñ auff eynander
erherttet / so hellt es trefflich fest. Der halben / vñ
der erst / soll man allen vleys anwendē / das anfeck-
lich / zwischen man vnd weyb / eynigkeyt vnd freunt-
schafft zu neme vnd eyn wurzle. Das geschiet am al-
ler furnemsten / wenn sich eyns gegenn dem andern
freuntlich erzeyget / vñ sich noch des andern weyse
richtet / die gunst vñ freuntligkeit so der schone halbe
ist / weret nicht lang. **XAN.** Ach meyne liebe **Eula-**
lia / ich bitt dich ganz vleissig / sage vns doch / wie ha-
stu deynen man dohyn gebracht / das ym deyne wey-
se vnd sitten wol gefallen / was hastu fur kunste ges-

B ij braucht

braucht. **EV.** Ich will dyrs sagen/aber derhalbē
das du auch also thun solst/vnnd myr nachfolgenn.
XAN. Ja wen ich kunde. **EV.** Du kanst leychtlich
wenn du wollst/du hast auch noch nicht zu lang ge-
harret/denn deyn mann ist noch innck/so bistu auch
noch eyne iunge frawe/vnd yhr habt euch eynander
kaum eyn iar gehabt. **XAN.** Du redest recht. **EV.**
Nu ich wils sagenn/aber du must stillschweygenn.
XAN. Ja dz wil ich thun. **EV.** Das war meyn fur-
nemste forge/das ich mich ganz freuntlich vnd lieb-
lich stalte gegen meynem manne / dz ich yho an myr
nicht hette ettwas/das ym mochte miszgefalle. Ich
hat achtung wie er gesynnet was/ich nam der zeyt
wahr/sonderlich / wen mit ym freuntlich was vmb
zugehen/vñ welche zeyt er leychtlich mochte zu zorn
gereyzt werden. Gleich wie die pflegen zuthun /die
elephanten vnd lawen zehmenn / odder andere der
gleichen thier/die man mit gewalt nicht zwingē kan
XAN. Gleich eyn solch vngesemet thier / hab ich yn
meynem hause auch. **EV.** Die mit den Elephantē
vmbgehen/die tragen keyn weys fleyd. Die der och-
sen wartenn/habenn nicht gern scharlack an. Denn
man hats erfarn das solche wilde thier/ vō disen far-
ben vngestummiger vñ grausamer werdē. Wie den
auch die Tigerthier/wen sie horen auff der Pauckē
schlagen/so toricht vnd rasendigē werden/dz sie sich
selber zureyssen. Die mit den pferden vmbgehen/ha-
ben yhre stymmen darzu/yhre schmechel wortt/yhr
streychen vñ andere ding/domit sie die pferde wo sie
wutendig vñ wild seynd/stillen vnd senssten. Beschri-
bet dz an den vnuornustigen wilden thieren/ wienil
mehr wils vns geburē/das wir diser kunste auch ge-
brauchen gegen vnsern mennern/ mit welchem wyr
mussen/wyr wollen odder wollen nicht/vnser leben-
lang

lang zu bett vnd tisch gemeynschafft haben. **XAN.**
Rede fort liebe **Eulalia** /wie du angefangenn hast.
EV. Do ich das merckte /d3 es so zugehen muste
do hylt ich mich nach ym /vnd hatte yha vleis / das
ich nicht ettwas thette / domit ich yhn entruste /
XAN. Wie kundstu d3 nur thñ? **EV.** Erstlich hat
ich achtung auff die hausförg /d3 alle ding do recht
zugienge / denn die förg ym haus / ist den weybern
benolhen / aldo thet ich nicht allein vleis / das nichts
vnuleyffig gethan wurde / sondern auch das alles na
ch seinē willē vñ synne zustunde / auch yn den allerge
ringsten stuckē. **Xan.** Warynne den? **EV.** Als wen
meyn man gerne dise odder yhene speyse asse / ob ers
so oder so gerne gekocht hette / ob er sunst od so gepet
tet haben wolte / darauff was ich geflissen. **Xan.** wie
thetestu aber / wen er nicht doheym was / oder wen
er truncken was? **EV.** Zu morgēs frue gieng ich zu
yhm / vnd wen ich mich lies duncken / er wer seer trau
rig / vnd kunde mit fuge nicht an yn komē / so lachet
ich nicht / ich erdachte auch keyne lügen / wie ettliche
weyber pflegen zu thun / sonder ich stalte mich auch
traurig / sam gieng mirs seer zu herczē. Den gleicher
weys wie eyn spiegel / wenn er anders gutt vnd recht
schaffen ist / alzeyt abmalet d3 angeficht des der hyn
eyn sibet / also zymet sichs auch / das eyn hausfrawe
sich stelle / wie dem manne zu mutt ist / auff das sie ni
cht guts muts sey / wenn er traurig ist / noch frolich /
wenn er ezornig ist . Ob er gleych yrgentt entrustett
ward / vñ zorniger denn er pflegete / do redet ich eynt
zwer freuntlich mit ym / oder schweige stille / vñ lies
yhn ymer hyn zornen / bis das der zorn ein ende hate
vnd bis ich raum vñ zeyt fand mich eyntzwar zu ent
schuldigen / odder yhn glympflich zu ermanhnen /
Also thet ich yhm auch / wen er zu zeyten wol getrun
cken zu

cken zu haus kame. Auch redet ich die selbige zeyt ni
chts anders / den was ich wuste dauon er gern hoeret
Alleyn trachtet ich darauff / das ich yhn mit gutten
wortē zu bette bracht. **XAN.** Es stehen aber die ar
men weyber nicht wol / wenn sie sich also nach yhren
zornigen / truncken / muttwilligē mennern / richten vñ
lencken müssen. **EV.** Das ist eben der rechte dienst /
den eyne dem andern thū sol. Es müssen die mēner
zu zeyttē auch vill an vns leyden. Es begibt sich aber
dennocht oft / das eyne weyb den man straffen mag
vnd vormanen ym sachen / daran ettwas gelegen ist
Wen es aber gering ding ist vñ der rede nicht wert /
so ist's bessers / das das weyb durch die finger sehe.
XAN. Wenn mocht sich das wol begeben? **EV.**
Wen yhm nichts ym kopff vmbgebet / ist nicht zorn
nigt / ist one sorge / ist nicht truncken. Den so magstu
yhn heymlich / vnd alleyn freuntlich vormanen / yha
herzlichē bitten / das er ym disem odder yhenen / an
ders sich zur hausnarung stelle / besser achtūg habe /
auff seyn geruch / auff seyne gesuntheit / vñ was
des dings mehr ist. Wen du yhn so vermanest / so si
he das es mit hofflichen schwenckhafftigen Worten
geschehe. Zu zeytten pflege ich mich mit eyner vorre
de anzudingen / dz er myr zusage / er wolle auff mich
nicht zornigt werden / ob ich yhn / als eym nerrisch
weyb / des erinnern vnd vormanē wurde / das yhm
zu ehren / gesuntheit vñ zu mercklichem gedeyhe / ge
reychete. Wenn ich ym nu hat / alles was ich wolde
zuuerstehen geben / machet ich nicht viel wort mehr
daruon / sonder hub yrgent vonn eym andern gutten
schwank an zureden / Den wir weyber / habē alleyn
vñ schier gemeyniglich alle / den gebrechen / wen wyr
angeheben zu reden / konnen wir nicht auffhoren.
XAN. Man gibts vns schuld. **EV.** Vnd sonder
lich nam

nich nam ich für allen dingen des war / das ich mei
nen man nicht straffte / wenn andere leutte vorhan
den waren / odder dz ich außserhalb dem haus / mich
dañ / gegen andern beclaget hette . Neyn traum / dz
thet ich nicht. Was yr zwe / vntereynander gethan
haben / findt man leichtlich radt zu. Wenn sich aber
eyn solcher fall begebe / der eynzwar nicht zu leyden
odder dem das weyb / mit vormanung nicht rathen
noch helffen kunde / so stehets viel besser / ist auch ehz
licher / das das weyb die klage / bey des mannes el
dern vñ freuntschafft antrage / denn das sie yhren
eldern ettwas dauon sage / vñ die klage also anstelle
vñnd messige / das sie nicht geacht werde / sam thue
sie es aus hasse / vñ nicht dem manne zu gutte / das
er des laster abgienge . Sie soll auch nicht alles her
außer blatern / wie es vñb die sache stehe / auff das
der man also heymlich mit erkenne / vñ gefallen tra
ge / an des weybs glympff vñnd redligkeyt. XAN.
Es mus eyn gescheyd klug weyb seyn / dz sich so hal
ten kan. EVL. Ja warlich / mit solchen stücken / musz
sen wir vnser menner / zu gleycher holdseligkeyt vñ
freuntligkeyt locken. XAN. Liebe / es seyen ettliche
mēner die man mit keynem glympff noch freuntselig
keyt / auff eyn andern weg bringen kan. EVL. Ich
halts aber nichtt / Nu laß yhr gleych ettliche seyn /
Bedenck erstlichen / das du must deynen man duldē
er sey wie er sey / so ist es yha besser zu duldenn / eynt
weder eynen / der ym selbst ym sitten nichtt vnenlich
ist / odder eynen den wir mit vnser holdseligkeyt / eyn
wenig freuntlicher vñ glympfflicher gemacht habē /
den eynen der vnser storrigkeyt halben / vonn tage zu
tag erger wurde. Wie wen ich dir mēner anzuzeigē
wuste / die yre weyber mit gleicher freuntseligkeyt vñ
glympff

glympff auff eyn andern syn gebracht haben. Thun
das die menner gegen den weybern/wie vil mehr ge
buret vns zu thun/gegen vnsern mennern. **XAn.** Ey
liebe/sage mir doch ein exempel dz sich mit meynem
manne gar nicht rheyne. **¶ Vl.** Ich kenne eyn erba
ren gelerten man/mit dem ich gutt eyns byn/der son
derlich geflissen ist auff zuchtige hoffliche sitten / der
man eyne iunge iunckfrawen zur ehe / die was bey si
benzehē iar alt/die auff dem dorffe bey yhren eldern
yhr lebenlang gewesen was/wie den der adel schier
aller luyt hatt auff dem dorffern zu wonen/vmb des
weydwercck's willē/zu iagen vñ vogel zustellen. Diser
man wolt eine albere/schlechte/eynfeltige dirn habē
die er nach seyner hand vnd nach seynem kopff zoge/
er begunde das weyb lesen lernen ynn der schrift/vn
terweyset sie ynn dem synnigen/gewenett sie auch so
mehlich mit/das sie ym saget/was der prediger pre
digt hett/vnd lernet sie ander ding mehr/die yhr zu
lezt nucz seyn solten. Dis alles/die weyls yr new vñ
vngheort ding was/wolt dem weyb nicht eyngehen
hatt eyn verdrys darauff/Denn sie was des mussig
gehens gewonet/vnd bey den bawers knechten ynn
grober bewrischer rede vñ leichtfertigkeit auffzogē
Sie wolt gar nicht dran/wen sie der mā darzu trieb
so weynet sie on vnterlas. Zu zeytten fiel sie darny
der/vnd sties dem kopff wider die erden / als wolde
sie yhr selbst den todt thū. Do des wesens keyn ende
werden wold/fracz es der man yn sich/vñ redet eins
freuntlich mit yr/das sie mit yhm eyn mal sich zu be
lustigen/auff das dorff zu yhrem vater zoge/das ge
fiel dem weyb sehr wol. Do sie nu hynaus komē/lies
der man das weyb bey der mutter/vñ bey den schwe
stern/zoge mit dem swecher auff die iagt/vñ do nie
mant vmb sie beide was/hub der man an/vñ erzelet
yhm alle

yhm alle sachen/vnnd sprach/er hette gehofft / yhm
solde eyne froliche gesellin seyns lebens zuteyll wor-
den seyn/so hett er eyne vberkomen/die onn vnterlas-
stetts weynete/vnd sich yemmerlichen stelte/ danou
er sie ynn keynem wege/widder mit bitten noch vor-
manen/brengē mochte/Seyne betth wer / er wolde
yhm doch helffen/das seine tochter von disem gebre-
chē entlediget wurde. Der Schweher antwortte vn̄
sprach/er hett yhm eyns seyne tochter geben/wen sie
yhm nichtt geho:sam wer/wuste er wol/wes er sich
hallten sollt/er mocht sie wol mit schlegen besser ma-
chen. Do hub der eyden an/vn̄ sprach/ich weys wol
was meyn recht ist/vnd was mir gezymmet zu thun
aber ich wolde lieber/das sie eyntweder durch deine
list/odder durch veterlich ansehen vn̄ gewalt/gebess-
sert wurde/denn das es zu diser lezten artzney komē
sollt. Der Schweher gelobet yhms/er wolltst halltē.
Ober eyn tag odder/zwene/ersabe ym der vater eyn
zeyt vnd ort/das er alleyn bey der tochter seyn moch-
te/do stalt er sich ernst/vnd fieng an zuerzelē / wie sie
so heßlich vn̄ grewlich wer/hett darczu keyn lieblich
geperde/vnd wie er sich offt geforchtet het/er wurde
yhr keyn man vberkomē/yhedoch sprach er/hab ich
michs grosse muhe vnd arbeyt kōsten lassen / ehr ich
dyr eyn solchen man gefunden hab / den eyne igliche
wol haben mochte /sie werde so schon vnd reych als
sie ymmer wolde/Vnd du erkennest noch nicht was
ich deinet halbē gethā hab/nimsts auch nicht zu her-
zen/das du eyn solchen man hast/welcher/wenn er
nicht so freuntlich wer/wunschet er ym deiner nichtt
zu eyn er mayd/noch stellest du dich / so eurisch vn̄ vn̄
gehorsam gegen ym. Das ichs nicht zu lang mache
Der vater redet sich so zornig /dz er sie schier geschla-
gen hette/Den es ist seher eyn bescheyd listig mann/
E der sich

der sich zu eyner iglichen sachen wol stellen kan / vnd
one larffen / auch welche Comedien er will / spielen
mag / die frawe erschrack sehr / fur forchte / vnd von
des wegen / das es die warheit w3 / fiel sie dem vater
zu fusze batt yhn / er wolde vergessen des was zuuor
geschehen wer / sie wolde hinfurder eyngedenck seyn
was yhr zuthun zustunde. Der vater / was zu fride /
vergabs yhr / vnd verhies yhr dazzu / sie solde eynn
herzliebsten vater an yhm haben / wenn sie sich der
zusage hielt. **XAN.** Was geschache darnach? **EV.**
Do sie von dem vater gieng / kamen sie yn yre schlaff
kammer / do selbst fand sie den man alleyn / siele yhm
zu fusz / vn sprach. Meyn lieber man / biszher hab ich
widder dich nach mich selbst erkant / du solts sehen
hynfurt / das ich gar anders worden byn / alleyn vor
gifs / was ich zuuor wider dich gethan hab. Do der
man dysz horet / nam er sie freütlich yn arm / kisset sie
vnd verhies yhr alles zu thun / wenn sie auff der mey
nung bliebe. **XAN.** Wie / bleyb sie den also? **EV.**
Zha yhr lebenslang / bys ynn todt. Es was nichts so
gering / das sie nicht frolich vnd willig thet / wenns
der man haben wolde / so eyn grosse liebe erhub sich
zwischen yhn / vnd bleyb auch stette. Ober vill iare
frewet sich das weyb offft / das yhr eyn solcher man
bescheret was. Denn wenn yhr der mann nicht wer
wordē / sprach sie / so wehr ich das aller armste weyb
auff erdenn. **XAN.** Solcher menner find man wol
so viel / als weyßer raben. **EV.** Wenn dirs nichtt
vordrillich wer zuhoren / wold ich dir ettwas sagen /
das nu newlich geschehen ist / ynn diser stad. **XAN.**
Ich hab nichts zu thun / so hore ich dir auch gerne zu
EV. Es ist eyn man hie nicht eyns geringen adels /
der selbige zog viel auff die iagtt / wie denn der Adel
pfllegt zuthun / der kam on gefar / auff dem dorffe / an
eyn tochter

eyn tochter/eyner armē frawen / begunde sie hefftig
lieb zu gewynnen/der doch nu eyn wolbetagter man
was. Umb der tochter willē/bleyb er vielmals zu na
chts auff dem dorffe/gab fur/er warttet der yegerey
Die hauszfraw des mannes/welchs gar eynn erbar
from weyb w3/ich weys nicht/w3 sie sich eins zwey
dunckē lies/kam dem man auff die spur/das er nicht
glauben hielt. Vnd do er eyns tags hynweck reysset/
hab vorgessen wohynn /gieng das selbige weyb auff
das dorff/yn der armen frawen haus/vñ erforschet
vleyssigk allen handel/wo er schliffe/waraus er tren
cke/vñnd wie herlichs allenthalben mit der koste zu
gieng. Do was keyn hauszradt/do was nichts denn
lautter armut. Das fromme weyb gieng heim/kam
bald herwider/bracht ein feyn gut bett/mit andern
geredt/ettliche trinckgeschyr/vnd gellt dazzu/sprach
wenn der widder keme/sollten sie yhn eyn wenig erli
cher halten/verhielts das yhr ehelicher man were/
vnd gab fur/sie wer sein schwester/Ober ettliche tag
kam der man heymlich widder an das ort/vnd sahe
das meh: hauszradt vorhandē was/auch kostlicher
zugericht dan vor/fraget er/wan der vngewonliche
schmuck herkemme/sagten sie yhm/eyn erbar from
weyb/seiner befreundtē eyne/hetts hyngebracht/vñ
beuolhen/das man seyner hynfurder dester erlicher
auswarttet. Als bald fiel. yhm ein argwahn eyn/dz
dys seyn weyb gethann hette/kam heym/fragt dar
nach/ob das weyb wer dort gewesen / sie laugnets
nicht er fraget warauff sie den hauszradt dorthin ge
schickt hette. Sprach sie. Meyn lieber mā/du bist gu
ter tag gewonet/vñnd ich erfure das mann dir nicht
guttlich thett/lies ich mich duncken/es wolte mir sol
chs zuthun geburen/auff das/weil du aldo lust hast
zusein/das du ein wenig dester erlicher gehalten wur
L ij dest.

dest. **XAN.** O dysz weyb ist allezu from gewesen / ich
wolt yhm / nesseln vñ disteln vntergelegt haben. **EV**
Aha hore nu wie es eyn ende nam. **Der man** / do er /
kante die frommigkeit vñ gutwilligkeit seyns weibs
hat er sich darnach nymer der ebrecherey geflissen
sonder seyne freude vnd lust / doheym mit seyn weyb
gehabt. **Ich** weysz / du kennest doch woll **Hilbart**
den **Holender**? **XAN.** **Aha** ich kene yn wol. **EV** **Der**
selbige / wie du weyst / was eyn fein / scho / iunckman /
vñ nam eyn allt weyb zu der ehe / das schier yhre tag
gelebt hatte. **XAN.** Das gelt nam er zu der ehe / ni
cht dz weyb. **EV.** **Aha** warlich wie du sagst. **Der**
hatt des alden weybs gar satt / begunde eyn iunges
frewleyn lieb zu habē / mit der er seyne lust hatte / aus
erhalb seym hausz / asse seldē doheym / wider zu mor
gens / noch zu abendts. **Was** wolltest du zur solchē
sache thun? **XAN.** **Was** ich? **Ich** wer der huren yn
die hare gefallen / vnd wenn der man hett wollen zu
yhr auff die bulschafft gehn / wolt ich yhn mit bisse
begossen haben / das er woll rucke / wenn er zur zeche
keme. **EV.** **Disz** weyb alhie thet ym viel weislich
er. **Sie** hatt die selbige bullerin zu gast yhn yhr haus
vnd gieng freuntlich mit yhr vmb. **Durch** die weysz
bracht sie yren man on on alle zauberey dohyn / dz er
doheym bleybe. **Vnd** wenn sichs zu zeytten begab /
das er aus dem hausz / bey der huren / das abentmal
hyelde / sandt sie yhn eynn gutts bissichen dahynn /
litz yhn sagen / sie sollten gutter ding seyn. **XAN.** **Do**
sturbe ich viel lieber / den wen ich meyns mans kupp
leryn seyn wolte. **EV.** **Bedenck** aber die sach bey
dir selbst / ist nicht also besser gewesen / denn das sie
durch yhr wutten / vnd rasen / den man ganz vñ gar
von yhr abgewandt hette / vnd yhr leben ym zangē
vnd hader zu bracht? **XAN.** **Ich** bekennes / das weni
ger schadens

ger Schadens bracht hatt/aber ich kuns nicht thun.
ED. Nu noch eyns mus ich dir sagen/darnach will
ich von den exemplichen auff horen. Unser nachbar
er do bey/eyn gutt from redlich man/aber ein wenig
zu gechzornih/der schlug eyns tages seyn hauszfrau
eyn ehlich weyb/vonn ydermann sehr gelobett / die
gieng yn die allerheimlichste kammer ym hausz/wei
net aldo vn̄ pfnuetzet/frasz den yamer/vn̄ das hertze
leyd ym sich. Ober eyn kleyne zeit darnach /kam der
man/yr gentt eyns gescheffts halbenn /auch ym die
kammer/vnd sahe das weyb weynnen/sprach er zu
yhr/warumb weynnestu/vnd pfnuetzest wie die kin
der? Do antwort ym das weyb fast kluglich / vnd
sagt. Ists nicht besser/das ich hye ym der kammer/
meyn vngluck beweyne/denn das ich so heulet vnd
schrie/wie ander weyber thun? Mit dem wort/nam
sie yhm das hercz/vnd vberwand yn/ das er yhr die
hand drauff gabe/vn̄ verhiesch yhr/er wolt sie nym
mer mer schlagen / er hiltz yr auch. Xan. Das hab
ich von meynem manne auch erlangett /aber gleych
durch das widderspiel. EDL. Es ist aber noch im
mer zu ein ewiger krieg vnter euch? Xan. Wz gibstu
mir do fur eyn radt? wie soll ich yhm hie thun? ED.
fur allen dingen/mustu stillschweygen/von dem vor
dries vnd widerwillen/den dir der man gethan hat
must ym ymmer so mehlich / widderumb seyn hercz
gegen dir versumen/mit wolthatenn /freuntligkeytt/
sanfftmutigkeyt/vnd wo mit du kanst/eyntzwar du
wirft yhn vberwinden/odder yho freuntlicher mach
en/denn du yhn iczt hast. Xan. Er ist viel zustrorisch
vnd wild/das ich yhn mit irgent eyner wolthat vber
teuffelte. EDL. Ey liebe Xantippe/sags nur nicht/
Es ist kein wild thier so grausam/dz man nicht mit
dinstbarkeit vnd wolthat korr machete/ich hab kein
D zweyffel

zweyffel/das mit eym menschen/auch kan geschehē
Vorsuchs ettliche monden mit ym / schild mich dar
nach drumb/wenn dir der radt nicht gelingen wirt .
Es sind auch ttliche gebrechē/do du must durch die
finger sehē. Aber darauff halt ichs / must du fur allē
dingen trachten/das du nicht hader vnd zancē anhe
best/yim der schlaffkammer/odder ym bette/sonder
achtung habst/das do alles lustig vñ frolich zustehe
Dem wen das ortt/darynnē man sich vorsunen soll
zuriffene gunst vñ freuntschafft/widerumb vernew
ern/vnreyn wirt von zancē vnd hader / so ist schon al
le arzney vnd bequemigkeit/freuntschafft zu machē
hynweckgenomen. Ettliche weyber sind so wunder
lich vnd selczam/das sie sich auch/wenn sie der eheli
chen werck pflegen/mit den mennern kiffeln vñ schel
den/machē also die wollust/die do solt den mennern
allen widderwillen/aus dem herczenn treyben/mitt
yhren vordrieslichen/ewrischē sitten / ganz vnd gar
vnlustig/verderben die arzney/domit sie der sachen
helffen soltē. **Xan.** Das hat sich oft mit mir begebē
ED. furwar/wiewol das weyb/stets trachten soll
das sie den man/nicht mit etwas entruste/sol sie den
noch also vleys ankeren/ das sie sich ym der ehepfli
cht/allenthalben freuntlich/gegē dem manne stelle.
Xan. Ya gegen dem manne/ich hab aber/an mey
nem manne/eyn bestien vnd wilds thier. **ED.** Rede
nicht vbel dauon/wyr machens oft selbst/das wyr
bose menner haben. Das ich aber/widder zur sache
komme. welche die alltē fabeln der Poeten lesen sa
gen/das Venus(die ein gottin vñ vorweserin ist des
ehestandts)eyn gurtel hab/die yr der got Vulcanus
gemacht hat/do sind hyneyn geflochtē/alle artzney
en/domit man der liebe rathen kan. Mit dehr gurtel
ymbgurtet sie sich/wenn sie mit yhren man / will zu
thun haben

thun habē. XAN. Do hor ich eyne fabel. EV. Eyn
fabel ist/aber hor/wz sie bedeut. XAN. Liebe sage
her. EV. Das lernt vns dise fabel/das eyn weyb sol
allen vleys ankerē/das sie yhren manne/ yn den ehe
lichen wercken/freuntlich sey/auff das sich aldo bey
der liebe/widderumb vornewere/auch aller widder
will vnd vordriesz/aus yhren hertzen gerissen werde
XAN. Wie kommen wir aber zu diser gurtel: EV.
Man darff dazu keyner zauberey. Es ist keyn kreffti
gere zauberey/denn wenn gutte sitten/vñ glympflig
keit vorhanden sind. XAN. Ich kan eym solchem man
als ich hab/nicht heuchlen/noch gutte wort geben.
EV. Du must dich nicht also stellen. wen du mitt
Circes zauberei/dein man kunst zur sawe/oder zum
bern machen/wolstu es auch thun: XAN. Ich weys
nicht. EV. Weystu es nicht? Woldstu lieber eyne
saw zum manne haben/odder ein menschen: XAN.
Ey ich wolt yho noch lieber eyn mensche habē. EV.
Wolan/wie wen du durch Circes zauberei/kondest
aus ein trunckenbold/ein messigē machen/aus eym
schlemmer/ein sparer/aus ein lassen/ein arbeitsamē
wurstus nicht thū: XAN. Vha warlich ich wolcz yho
thun Wo wurde ich zu solchen kunstē kommē: EV.
Ich sage dir / dise kunstē hastu bey dyr/wiltu sie nur
brauchen. Der man ist deyn/dn wilt odder wilt ni
cht/machst du yu gutt/so hastu yhn deste besser/vnd
der fromme/wirt deyn am grosten seyn. Du hast al
lein auff seyne gebrechen gesehen / die machen dz du
yhm heffiger wirst/vnd ergreiffst yn nur an dem ort
do bey du yhm nicht hallten kanst. Sibe mehr auff
das/das do gutt an yhm ist/vnd erwusche yhn bey
dem ort/do du yhn vormagst zuballten. Ehr du ym
genomē hetts/soltestu darauff gesunnen habē/was
er fur gebrechē/an ym gehabt hett. Man mus nicht

D ij alleyn

alleyn mit den augen/sonder auch mit den oren /eyn
man außserlesen. Tzt ist zeit der sach zu helffe/nicht
viel dauō zu klagen. XAn. Welche hat yhe/mit den
oren/eyn man genomen? EVL. Die nimpt eyn mā
mit den augen/die nichts anders ansihet / denn die
schonheyt/vñ die gestalt des leybs. Die aber nimpt
yhn mit den oren/die do vleyssig achtung hatt / was
fur eyn gerucht/von yhm gehet. XAn. Das ist eyn
guter radt/aber er kompt mir zu spehet. EV. Dz ist
nicht zu spehet/den man/widder auff eyn guttē weg
zu bringen. Zu diser sachen wirt dir nicht eyn wenig
dienen/wenn er eyn kindt mit dir zeuget. XAn tip.
Ich hab bereyt/mit yhm/eyn kindt gehabt. EVL.
Wen? XAn. Es ist langst. EV. Wie viell monden
seyns wol? XAn. Schier siebene. EVI. Was hore
ich? machst du vns aber/auff ein newes zu lachē mit
deynem kinde/das du nur drey monden tragē hast?
XAn. Traum neyn. EV. Es mus yhe so seyn/wenn
du von der hochzeit an rechenst? XAn. Vha ich rede
te yn auch an/vor der hochzeit. EV. Kommē auch
kinder vom anredē? XAn. Er ergreiff mich an alles
gefesz/ein mal alleyn/vñ begunde mit mir zuscherz
en/kuczlet mich vnter den vchszē/vñ yn der seyten/
dz er mich lachend macht/Do ich das kuczeln nicht
leidē kinde/fiel ich ins bet/aldo herzet er mich/kans
nicht wissen/wz er mir meh? thet/als bald darnach/
vber ein kleyne zeit begunde mir der bauch zu schwel
len. EVLa. Vorachte nu deynen man/der dir mit
scherzē kinder macht/Was wur er thñ/wens ernst
gulde? XAn. Ich halts darfur/ich sey bereyt wider
schwanger. EV. Ey das ist recht/eyn gut acker/hat
eyn gutten ackerman vberkomē. XAn. Daran felts
yhn nicht/er thut yn dem/meh? den ich beger. EV.
Der wort durffe sich wenig weiber/mit dir zugleich
berhumen

berhumen. Du hast yhn aber nu zur ehe genomenn?
KAN. Jha traum. ED. Ey so ist dyrs / nicht so gros
gefahr. Ist das kind eyn knebichen? KAN. Jha. ED
Das wirt euch widder zu freunde machen / wen du
dich alleyn selbst / wilt ym die sache schickē. Was sa
gen doch andere leutte von deynem manne / seyne ge
sellen / vñ andere / die mit ym sunst gemeynschafft ha
ben? KAN. Sie sagen / er sey freuntlicher gutter sit
ten / glympflich / mild / vnd wie man yhn nur habenn
will. ED. La. Das gibt mir eyne gutte hoffnung / er
werd noch werdenn / wye wyr ym habenn wollem.
KAN. Dir aber alleyn / wil er nicht so freuntlich sein
ED. Liebe Kantippe / erzeyge dich doch also gegen
yhm / wie ich dir gesagt hab / wenn er nicht anders
wird / soltu mich ein lugnerin heissen. Bedenck auch
das / er ist noch iungk / ich halt er sey kaum vier vnd
zweynzig iar alt / er weis noch nicht / woz zum hausz
vater gehört / tracht nur nu nichtt / das du dich vom
ym scheidest. Ka. Ich habs aber offst gedacht. ED.
Wen dir solche gedancken mehr eynfallen / so syme
erstlichen bey dir aus / wie eyn arm ding es ist / vmb
eyn weyb / wens vom manne kompt. Der allerhub
schte schmuck / eyns erberu frommen weybs / ist der /
das sie yhrem manne gehorsam sey / vnd willigk.
Also hatt die natur geschaffen / so wills auch Gott
haben / das das weyb dem manne gehorchen sol. Al
leyn gedencck darauff (wie es denn die warheytt ist)
das er deyn man sey / vnd kanst keyn andern haben.
Darnach laß dir auch zu herzen gehē / das knebich
en / welchs ewer beyder zu gleich ist. Woz wolstu dor
mit machen? sollst du es mit dir nemē / so wurstu den
man / seyns gutts berauben / liessst du es ym den / so
wurstu dich seibs beraubenn / des allerliebsten kley
nods / das du auff erden hettest. Zum lezten / sage
D iij myr

wir/hastu yemandts der dyr arges gunnet? **XAN.**
Ich hab eine rechte stiffmutter/darzu eyne schwiiger
die sind vber eyn leyft geschlagē. **ED.** Summen sie
dir so viel arges? **XAN** tip. Sie wolten lieber ich wer
todt. **ED.** Las dir die auch zu herczen gehen. was
kuntstu yhn doch ymmer meh: angenemers thun/
den wenn sie dich sehen/von dem manne geschieden
seyen/vnd das du eyne wittwe werest/ yha meh: den
eyne wittwe/die wittwe mugen yho andere menner
nemen. **XAN.** Warlich deyn radt gefellet mir wol
mich verdreusst aber. der stetten muhe vnd arbeyt.
ED. Rechēs aber wie viel wirstu wol müssen arbeit
haben/ehr du den psittich reden lereest? **XAN.** Vor
war viel muhe wirt drauff gehē. **ED.** Vordreusst
dich deñ ein wenigē muhe zu haben/das du dir dein
man anderst machest/mitt welchem du/all die zeyt
deyns lebens/vollenden must. Wyeviel zeyt bringē
wol dy menschē zu/ehr sie ein pferdt gschickt machē/
vñ es sol vns verdriessen/dohin arbeyt zuwendē/das
wir freuntliche/holdselige menner vberkomē? **XAN**
Wie soll ich yhm denn thun? **ED.** Jetzt hab ichs ge
sagt. Sihe das es alles gleyssē im hauszē/das nichts
vnsaubers/noch vordriesslichs do sey/das in mocht
aus dem hauszē yagen. Stelle dich freuntlich gegen
yhm/vorgisz dennoch vnter des nicht/der ehrerbiet
tung/so ein weyb dem manne zuthū schuldig ist/bisz
nicht traurig/bisz auch nicht zu furbicz/bisz nicht vn
lustig bisz auch nicht zu reyffig/hallt dein hauszradt
feyn reyn. Was er gern isset/das Koch ym / vnd das
yhm allerbesten schmecket. Des gleichen stelle dich
freuntlich vnd glympflich gegen den/die er lieb hatt
lade sie gerne/vñ offft/zu gast. Wen du geste hast/so
sihe das alles frolich/vnd voller freude sei. Ob sichs
als den begeben/das dein man ettrwa/vō dem weyn/
frolicher

frolicher wurde/vnd zu zeytten auff der lauttē schlus
ge/so sing yhm ynn die lauttē. Mit der weys mocht
stu yhn gewenen/ym hausz zu bleybē / vñ viel vnkost
vorhyndern. Denn zu lezt mus er also gedencke/fur
war ich schwirm gutt ding/ das ich außzerhalb mey
nem hausz/mit hurē schleime vñ themme/nicht on
mercklichen schaden/beyde meyn gutts vnd meyns
geruchts so ich doch doheim viel ein frolicher weib
hab/vñ die mich viel lieber hat welcher meiner nach
allem lust/lieblicher vñd freuntlicher außwartet.
XAN. Liebe Eulalia/meynstu auch/das ich wurde
ettwas außrichtē/wen ich michs vnterstunde? ED
Sihe mich an/ich wills auff mich nemen. Inn des
will ich mit deynem manne reden/will yn erynnern/
was yhm geburt zuthun. XAN. Den rad lobe ich/
aber hab achtung/das er vō den dingen nichts mer
cke/er wuhz sunst/das vnterste zu oberst keren. ED.
Furcht dich nicht/ich wil wol mit ein vmbschwiff
hereyn komen/das er mir selbst sage/wie ihz mit cyn
ander stehet /weñ ich das than hab/will ich yn /wie
ich pfleg/auffs freuntlichste hādeln/vñ als ich hoffe
will ich dir yn/viel holdseliger machē Wo sichs schi
cket/wil ich von dir/cyn wenig liegen/vñ sagen/wie
du alles gutt von yhm redest. XAN. Der herr
Christus gebe vns gluck/zu dem das wir
fur haben. ED. Das wirt er thun/
sihe alleyn/das es an
dyr nicht fehle.

[Faint, illegible text, likely bleed-through from the reverse side of the page.]

[Faint text from the adjacent page, including a red initial 'R' and the word 'medicamentum'.]



Kp 1536

ULB Halle 3
001 516 213



M





